



# ज्वलपा वा:पौ

JWOJALAPA NEPALBHASKAR WEEKLY

दैं ६ ल्या: ४४ (पूर्णडिक ९६) ने. सं. ११३६ बछलागा पारु आइतवा: २०७३ जेठ ९ गते आइतवार (May- 22, 2016)

मू ८।-

## नेवा: स्वायत्त राज्य मंका: संघर्ष समितिं छु याइ ?



### मंका: संघर्ष समिति न्हूगु कथं दयेकेगु निर्णय यायेवं अन्यौलता

ज्वजलपा वा:पौ/

नेवा: स्वायत्त राज्यया नितिं संघर्ष याना वयाच्वंगु नेवा:तयगु मंका:गु मोर्चा नेवा: स्वायत्त राज्य मंका: संघर्ष समितिइ हाकनं न्हूगु कथंया समस्या व:गु दु ।

न्हापा नं छक: मंका: संघर्ष समिति विघटन यायेगु ला कि छु यायेगु धका: तसकं बहस जूगु ख:सा आ: वया हाकनं मंका: संघर्ष समितियात न्हूगु कथं दयेकेगु धका: मुंज्याय् खं पितह:गु ख: । विशेष याना संघीय गठबन्धनया छगू मोर्चा तकं दुध्या:कूगु मंका: संघर्ष समितिया जिम्मेवार नेतातयसं थ:पिं मदुगु अवस्थाय् मुंज्या च्वना छाय् संघीय गठबन्धनय् दुध्याकागु ख: धका: वंगु छु दिं न्हय: जक च्वंगु बैठकय् न्हयस: त:गु ख: ।

उलि जक मखु संघीय गठबन्धनपाखें लिहां वयेमाल धका: तकं खं पिहां वयेवं आ: मंका: संघर्ष समितियात न्हूगु कथं दयेकेगु धका: खं निर्णय तकं यात धका: सूत्रं ज्वजलपा वा:पौयात जानकारी बिउगु दु ।

मंका: संघर्ष समिति अथे न्हूगु कथं दयेका वनेगु धका: निर्णय या:गु धइगु आ:या संरचनायात भंग याना नितान्त न्हूगु हे संरचना

### संघीय गठबन्धनया लगातार प्रदर्शन, सोमवा: किपुलिइ

ज्वजलपा वा:पौ/

पहिचानया आधारय् नेवा: प्रदेश स्थापना यायेमा:गु भाषिक समानता, जातीय समानता, जनसंख्याया आधारय् समानुपतिक समावेशी नापं फुक्क कथंया उत्पीडनपाखें मुक्त जुइगु नितिं संविधान पुनरलेखन यायेमा:गु माग याना संघीय गठबन्धनं लगातार रुपं येँ केन्द्रीत प्रदर्शन याना वयाच्वंगु दु ।

वंगु जेठ १ गते येँ जुलुस पिकया त:जिक प्रदर्शन या:गु ख:सा कन्हय् खुन्हु व कंस खुन्हु २ व ३ गते सिंहदरवार घेराउ या:गु ख: । अथे हे ४ गते वालुवाटार घेराउ या:गु ख: । ५ गते रत्नपार्क लागाय् आमसभा या:गु ख: ।

दयेका वनेगु धका: धा:गु ख: । उकिया अर्थ आ: संघीय गठबन्धनय् नेवा: स्वायत्त राज्य मंका: संघर्ष समिति मन्त धका: घोषणा यायेगु धका: नं धा:गु ख: । इतिहासय् न्हापांखुसि पहिचानया नितिं लिम्बुवाननिसें मधेसी अले नेवा:तनिसें तामाडत छगू हे थासय् च्वना आन्दोलन यानाच्वंगु अवस्थाय् मंका: संघर्ष समितियात छगू कथं विघटन याना न्हूगु कथं दयेकेगु धा:गुया अर्थ संघीय गठबन्धनपाखें पिहां वयेगु धा:गु हे ख: । मंका: संघर्ष समितिइ नेवा: पहिचानया अस्वीकार याइपनिगु संगठन नं मदुगु मखु अले



अथे हे ६ गते यलया लगंख्यल मंगलवजा: तक प्रदर्शन याना सभा या:गु ख: । अथे हे ७ गते न्हूवानेश्वरय् प्रदर्शन या:गु ख:सा ८ गते स्वयम्भुइ प्रदर्शन या:गु ख: ।

अथे हे जेठ ९ गते गौशाला लागां जुलुस पिकायेगु र्वसा: र्वयात:गु दु । १० गते किपुलिइ

त:जिक प्रदर्शन याइगु जूगु दु । सोमवा: किपूया न्हूवजा: दुहां वयेगु ध्वाखाय् ४ बजे मुना जुलुस सहित प्रदर्शन यायेगु व त:गवपि नगां दोवाटोय् थ्यंका: सभा यायेगु र्वसा: र्वयात:गु दु ।

उगु सभाय् संघीय गठबन्धनया नेतातयसं सम्बोधन

यानादीगु ज्याभ्व: तयात:गु दु । संघीय गठबन्धनय् संघीय समाजवादी फोरम नेपाल, तमलोपा, सदभावनानिसें नेपा: राष्ट्रिय पार्टी, आदिवासी जनजाति राष्ट्रिय आन्दोलननिसें नेवा: स्वायत्त राज्य मंका: संघर्ष समिति नापं याना थीथी राजनीतिक दल व मोर्चा नापं याना २९ गू घटक दुध्यानाच्वंगु दु ।

गवले तक नेपा:या बहुसंख्यक आदिवासी जनजाति, मधेसी नापं उत्पीडित समुदायया माग पुरा जुइमखु अबले तक लागतार रुपं राष्ट्रिय आन्दोलनयात न्ह्याका वनेगु जुइ धका: संघीय गठबन्धनया नेतातयसं धयादीगु दु ।

मेपिनिगु योजना कथं संचालन जुइपिं नं मदु धका: धायेमफु । अयनं छगू राष्ट्रिय आन्दोलन यानाच्वंगु अवस्थाय् मंका: संघर्ष समितिइ व:गु समस्यायात ज्यंका वनेगु नितिं माल धा:सा पुनरगठन याना वनेगु मयासे छगू कथं विघटन हे याना न्हूगु दयेका वनेगु धा:गु वास्तवय् पहिचानया आधारय् नेवा: प्रदेशया पक्षय् दुपिं नेवा:तयत अभ् नं अलमलय् लाकेगु कुत: या:गु दु धा:सां छु पाइमखु । उकिं थ्व इलय् धात्ये मंका: संघर्ष समिति गुगु कथं न्ह्या: वनीगु ख: धका: न्हयस: तयाच्वंगु दु ।

## नेवा: पत्रकार राष्ट्रिय दबूपाखें मातृभाषा पत्रकारिता दिवस हन

नेपालभाषाया पत्रकारिता सुरुजुगु ९० दैं दुगु लसताय् वंगु सुक्रवा: नेवा: पत्रकार राष्ट्रिय दबू नं मातृभाषा दिवस हन ।

नेपाल संवत् १०४५ (वि सं १९८२) बुद्ध जयन्तीया दिखुन्हु भारतया कलकतां धर्मादित्य धर्माचार्य (जगतमान बैद्य) बुद्ध धर्म व नेपालभाषा नांया पत्रिका पिका:गु हे न्हापांखुसी नेपालभाषाया पत्रकारिता सुरु जूगु ख: ।

थ्वहे पत्रिका सम्भवत: गैर नेपाली भाषां प्रकाशित न्हापांगु पत्रिका ख: धइगु अजतकया अध्ययन अनुसन्धानं प्रमाणित या:गुलिं मातृभाषा दिवस हनागु खं नेवा: पत्रकार राष्ट्रिय दबूया

केन्द्रीय नाय: श्रीकृष्ण महर्जनं धयादिल । थुगु अवसरय् धर्माचार्यया जीवनीनाप स्वापू दुगु थीथी ऐतिहासिक दस्तावेजत व वयकलं पिकयादीगु पत्रिकाया थीथी ल्या:त नं प्रदर्शनी या:गु ख: । अथेहे यलया पुल्चोकय् च्वंगु धर्मादित्य धर्माचार्यया सालिकय् स्वांमा: व्वखाय्का प्रभातफेरी या:गु ख: ।

पुल्चोकं सुरु जूगु प्रभातफेरी गावहाल, मंगलवजा:, च्यास: जुया भोलाख्यलय् च्वंगु ज्यापू प्रज्ञा भवनय् थ्यंका: व्व:चा:गु ख: । उगु च्याली नेपाल पत्रकार महासंघ, नेपाल आदिवासी जनजाति पत्रकार महासंघ, नेपाल मधेशी पत्रकार समाज व पत्रकारितानाप

स्वापू दुगु थीथी संघसंस्थातयगु सहभागिता दुगु ख: । ज्यापु भवनय् थ्यंका: जूगु सभाय् वक्तातसें संविधानं देसय् ल्हाइगु फुक्क मातृभाषा राष्ट्रभाषा धायेयुंका: मातृभाषाया पत्रकारिताया विकासया लागि राज्यं विशेष ध्यान बिइमा:गु खँय् ब: वियादिल । प्रत्येक नेपा:मियात मातृभाषाया माध्यमं सूचं कायेगु व सुसुचित जुइगु हक दुगु धयादिसें उकिया प्रत्याभूति याकेत राज्य तयार जुइमा:गु खँय् वियादिल ।

उगु सभाय् ललितपुर जिल्लाया प्रमुख जिल्ला अधिकारी ऋषि रम शर्मा, मधेशी पत्रकार समाजया अध्यक्ष मोहन सिंह, नेपाल



आदिवासी जनजाति पत्रकार महासंघया संस्थापक अध्यक्ष चन्द्रसिंह कुम्लुङ, नेवा: पत्रकार

राष्ट्रिय दबू ललितपुर कचाया अध्यक्ष सुरज व्यञ्जनकारं मातृभाषा पत्रकारिताया विकासया

लागि राज्यं हे मातृ भाषा पत्रकारिता दिवस हनेमा:गु धारणा तयादिल ।



## ज्वजलपा वाश्यो

सल्लाहकार  
श्रीकृष्ण महर्जन  
प्रकाशक:

नजरराम महर्जन  
सम्पादक

श्रीकृष्ण तण्डुकार  
ले-आउट:

ज्वजलपा डेस्कटप  
संवाददाता

भरत महर्जन, निरजमान सिंह  
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : kirtipur\_sandesh@live.com

### सम्पादकिय

## सकारात्मक पला: तर अर्थपूर्ण अन्तर्राष्ट्रिय बौद्ध सम्मेलन

वर्तमान सरकार बुद्ध जयन्तीया लसताय लाका थुगुसी तःजिक अन्तर्राष्ट्रिय सम्मेलन यात । बुद्ध जन्म जूगु जक मखु शान्तिया मुहान हे नेपा: ख: धइगु विश्वय् सन्देश बिइगु कथंया सम्मेलन या:गु धइगु तसकं सकारात्मक ख: । सम्मेलनय् गुलि च्वय्या तह:यापिं व्यक्तित्वपिं वइ धका: आशा या:गु ख: उलि मव:गु जूसां सरकार या:गु ज्या हे छगू कथं सकारात्मक खने दु ।

ज्याभव: गुलि सकारात्मक खने दु उलि हे अर्थपूर्ण नं जूगु दु । जारी जूगु संविधानय् नेपा: धर्म निरपेक्ष राज्य धयात:गु जूसां नं धर्म निरपेक्षता धाइगुया अर्थ विश्वय् गनं नं मदुगु कथं सनातननिसें चले जुया वयाचंगु धर्मयात संरक्षण व सम्बर्द्धन यायेगु खँ दुध्याकत:गु दु । उकिया अर्थ धइगु हिन्दू धर्मयात हे प्राथमिकता विधात:गु ख: । उगु खँयात नेपा:या बौद्धमार्गीत नाप नापं मेमेपिन्सं तसकं विरोध याना वयाचंगु अवस्थाय् हे सरकारं बुद्ध जयन्तीया भवलय् गुगु कथं अन्तर्राष्ट्रिय सम्मेलन यायेगु ज्या यात थ्व धइगु बौद्ध धर्मालम्बीपिन्त छगू कथं हयेकेगु ज्या या:गु हे खने दु ।

संविधानया ल्याखं जक मखु कि सम्मेलनय् भारतया मन्त्री तकं उपस्थिति मजगु अले राजदूत जक उपस्थिति जूगुलिं नं भारतं गुलि प्राथमिकता बिल धका: क्यनाचंगु दु । बौद्ध सम्मेलन जूसां नं केपी शर्मा ओलीया वर्तमान सरकारयात अन्तर्राष्ट्रिय जगतं स्वइगु पह:या थुगुसीया सम्मेलनं स्पष्ट याना विउगु दु । उकिं थुगु खँयात स्वयं सरकारं ध्यान तयेमा:गु अवस्था दु ।

### साहित्य/चिनाखँ

## हाईकू शौरभ शाक्यया

### शौरभ शाक्य

#### खप

७३. तिफ्याये मफु

सुनावंगु नगू थी

नसंचा वीत ।

७४. मक्वा:गु भुटु

लुइ मखा:गु नसा

राजनीति थौं ।

७५. सत्ताया धाप

फिसलय् न्या: फात्राक

आज्जु खुत्यां का ।

७६. चैतया धाकु

यसिं क्वम:दले

फसंपू मन ।

७७. थुलि काँ हाल

जि देनेया सौरभ

छंत छु कने ।

७८. तस्कर मौजा

सिमाना वारपार

चकं बनेज्या ।

## संघीय गठबन्धनया आन्दोलनय् जिं छाया ब्वति कया



### नजरराम महर्जन

बंगु जेठ १ गतेनिसें संघीय गठबन्धनं काठमाडौं केन्द्रीत आन्दोलन न्ह्याका वयाचंगु दु । जेठ १ गते सनिवा: रत्न पार्क शान्तिवाटिकाय् मुना: नारा जुलुस सहित येंदेय् चाहला ठँहिति छगू सभा यात । आदिवासी जनजाती, मधेसी, दलित व उत्पिडनय् ला:पिं द्वलन्द: मनूत सहभागी जूगु उगु जुलुसय् थीथी नारा नं थ्वय्कूगु ख: । हिमालया शेर्पांनिसें आदिवासी, जनजाति मधेसीतयेगु मंका: संघर्ष ज्याभव: कथं व जुलुस जूगु ख: । जुलुसय् ब्वति का:पिं स्वयेबलय् पुरा हे समावेशी खनेदु । गुकिं याना: पहिचानया आन्दोलन मधेसीतय्गु आन्दोलन धया: वयाचंगुपिन्त थ्व छगू हाथ्या जुया ब्यूगु दु ।

कन्हय्खुन्हु अर्थात जेठ २ गते आइतवार सुथय् गुता:इलनिसें सिंह दरवार घेराउ ज्याभव: दुगु ख: । जि नं व ज्याभवलय् ब्वति का:वना । न्हापां सुथय् भतिचा प्रहरी व आन्दोलन-कारीया दथुइ घ्वातुघ्वाना संगु ख: । तर छुं नं अप्रिय घटना मजू । न्याता: ईजूबलय् कन्हय् ३ गते नं घेराउ जुइगु जानकारी बिया घेराउ कार्यक्रम क्वचायकल । जिं छँय् वया: ।

च्या त्वना: फेसबुकय् आन्दोलनया फोटो अपलोड यायेगु याना । फोटो अपलोड यानाच्वनाबलय् हे छम्ह नेवा: पासां जिगु मेसेज बक्सय् मेसेज छ्वया हल ।

“नजररामजी, छित छु मगाना: थ्व मधेसीतय्गु आन्दोलनय् ब्वतिका: जुयागु ? पुलिसं छुं या:सा छुयाये ?”

“थ्व मधेसीतय्गु जक आन्दोलन मखु । उत्पीडनय् ला:पिं, अधिकारया लागि न्ह्यानाचंगु आन्दोलन ख: । उकिं जि नं सहभागी जुयागु ख: । आन्दोलनय् वनेबलय् पुलिसं छुं या:सा, छुं जुइला धका: मनय् पीर कायेगु ख:सा आन्दोलन धइगु गुबलें जुइमखु । मेगु खँ छगु मिखाय् जित मगा:गु छुं हे मदु । च्वनेत जि छँ दु, नयेत बुँ बाली दु । जि छँय् तिरि मयजु दु । काय दु, भौ दु अले छय् नं दु । छगु मिखां स्वयेबलय् मेपिं मनूतय्गु मिखां स्वइबलय् जि छम्ह सम्पन्नमह मनू ख: । जित: मचा: मगा:गु छुं हे मदु । तर जित: मगा: मचा:गु यक्व दु ।”

“छु छु दुलय् ? कायुनं धा:गु खँ मन्यंलाकि छु ? मुदा मामिला दु ला कि छु ?” पासां न्यना:हल ।

“मखु, जिगु छँज:, त्वा:वा: सुयापाखें जित: छुं मगा: मचा:गु मदु । जिगु विरोध दुगु ख:सा थ्व सरकारनाप विरोध दु । थ्व सरकारं पितब्यूगु संविधान प्रति जिगु असहमति दु । थ्व जिगु

देशय् जिगु मांभाय्यात राष्ट्रभाषा धा:सां गनं सरकारी मान्यता मदु । राष्ट्रभाषा धया: भीत चाकु नका: .... फेकेत्यंगु दु । गुकिं भीपिं थ्व देय्या आदिवासी जुया: नं थौं निगूगु दर्जाया नागरिक जुया म्वाना: च्वनेमाल ।”

“थ्व संविधानकथं भीगु शाखा सन्तानं भीगु भाषा व जीवन्त संस्कृति ज्वना म्वाये फइगु वातावरण हे मन्त । हजारौं हजार वर्ष लगय् याना: दयेका: त:गु भीगु भाषा, संस्कृति व सभ्यतायात म्वाका:तयत थ्व सरकारं छुं हे या:गु मदु । जबकि जि नियमित रुपं थ्व देय्यात कर पुलाच्वनागु दु । जिं कर पुला: म्वाका:तयागु सरकारं भीगु थासय् आप्रवासीत दुक्या: भीपिंयें जा:पिं मूलवासीतय् अल्पमतय् लाका: सिधय्केगु कुत: यानाचंगु दु ।”

“स्वनिग:या मनूत त:भुखाचं याना: तसकं दु:ख कष्ट नयाचंगु ईयागु लव: कया: जबरजस्तीं न्हूगु संविधान पितबिल । गुगु संविधान कथं जिं थ:गु अस्तित्व म्वाका: तयेफैगु अवस्था हे मन्त । उकिं जिं भीगु अस्तित्व रक्षा याइगु अधिकार फ्वनाच्वना । स्वाभिमान पूर्वक म्वाये खनीगु अधिकारया लागि जि आन्दोलन यानाच्वना ।”

“थुज्व:गु बृढेसकालय् याउँक छँच्वना मच्चवंसे छाया निभालय् क्वयेक: जुयाच्वनागु ? अन आन्दोलनय् गुलि नेवा:त कहां वयाचंगु दु ?” पासां च्वयाहल ।

“अन स्वाभिमानी नेवा:त यक्व सहभागी जूगु दु । देसय् दुगु हिइके मा:गु कानूनया विरुद्ध जि बुराम्ह नं ल्याय्महया जोश पिकया: आन्दोलनय् वनाच्वनागु दु । जि थ:गु स्वाभिमानया निंति ल्वाना च्वना । छुं नं पार्टी वा नेताया लठैत जुयामखु । खस-बाहुनया भलाई याइगु बाहुनतन्त्रिय संविधान हइगु नश्लवादी पार्टीया कार्यकर्ता जुयामखु, थ:गु न्हापाया, आ:या व भविष्यया पुस्ताया विचा: याइमह विवेकशील मनू जुया विचा: यानादिसँ ।”

“छुं नेताया लठैत जुया: मखु, छम्ह स्वाभिमानी नेवा: जुया: विचा यानादिसँ । भीगु देय् गुखे यनाच्वन थ्व नश्लवादी सरकारं । नयेगु निंति थ:गु आत्मसम्मान मी मते । नयेगु निंति न्ह्याक्व दा: सां ला खनकि खिचा वहे मनूयाथाय् वनी । भीपिं खिचा मखु मनू ख: । सज्जन जुइगु लोभय् समाजया मभिंगु खँ, मभिंगु ज्यायात स्वीकार यायेमते । क्षणिक फाइदाया निंति नेताया दास जुईमते । कन्हय् नं सिंहदरवार घेराउ ज्याभव: दु । सच्चा देशभक्त ख:सा देशघात याइपिं दललातय्गु कब्जाय् लानाचंगु सिंहदरवार घेरय् यायेत वा ।”

कन्हय् खुन्हु जेठ ३ गते नं जि घेराउ कार्यक्रमय् ब्वति का:वना । जि स्वया न्ह्य:हे जिम्ह पासा अन थ्यंकाच्वने धुंकल । वयात अन खना: जिगु मन

तसकं लयताल । वं जित: संघीय समाजवादी नेवा: संघया छगू पर्चा ज्वका:धाल, “का थ्व पर्चा व्वं ।”

“थ्व पर्चाला जिं न्हापा हे व्वनेधुन । कयौंसित इना: नं बियागु दु । थ्व पर्चाय् छित: य:गु छु छु खँ दु ।”

वं थ:त य:गु पर्चाया बुँदागत मुदा व मांगत व्वना न्यंकल ।

—अन्तरिम संविधान २०६३या धारा १३८ (१) व १३८ (१क) कथं ऐतिहासिक पृष्ठभूमि, लागा, पहिचान व सामर्थ्यया लिधंसाय नेवा: प्रदेश लगायत लिम्बुवान, किरात/खम्बुवान, शेर्पा, ताम्सालिङ, तमुवान, मगरात, थरुहट, खसान व मधेस नापं शिल्पी (दलित) समुदायया गैर भौगोलिक विशेष प्रदेश सहित भिगु प्रदेश जुइमा:गु ।

—सरकारी ज्याखँय् बहुभाषिक नीति लागू यायेमा:गु । फुकं भाषाया संरक्षण व थपू यायेगु दायित्व राज्यया ख: । फुकं मातृभाषापिंसं मांभासं सूचना कायेगु हक दु । राज्यं मातृभाषं ज्याभव: न्ह्याकीगु रेडियो, टिभी व छापायात नं अनुदानया व्यवस्था यायेमा:गु ।

—प्रतिनिधि सभाय् प्रदेशया जनसंख्याया अनुपातय् समानुपातिक प्रतिनिधित्वया व्यवस्था यायेमा: । राष्ट्रिय सभाय् फुकक प्रदश व जातिया प्रतिनिधित्व जुइमा ।

—राज्यया फुकक अंग, निकाय व तर्गिमय् जातीय जनसंख्याया लिधंसाय समानुपातिक समानुपातिक प्रतिनिधित्व जुइमा: । अथेहे नेपाली सेनायात लोकतान्त्रिकरण याना: सेना व सुरक्षा निकायलय् समानुपातिक समावेशी यायेमा: ।

—देय्या न्यायपालिका सङ्घ राज्यया मान्यताकथं स्वनेमा: ।

—देय् आ: माफियातन्त्र व हाकुबजाया यक:ति जूवंगु दु । वेसा: भा: तत्काल नियन्त्रण याना: न्हिथंया मा:गु ग्याँस, मतचिकं, पेट्रोल, डिजेल व उपभोग्य वस्तुया उचित भाव याकनं व्यवस्था याना बिइमा: । त्वनेगु ल:, फोहरमैला, लोडसेडिङ आदि समस्याया तुरुन्त ज्यकेमा: ।

—भुखाचं छँ दुपिन्त सहलियत ऋण वडा कार्यालय संयोजन याना: याकनं हे उपलब्ध याना: बिइमाल ।

थ्वला भी सकसियागुं हे माग ख: । थ्व संघर्षया वारे मनूतय्त थुइके हे मफयाचंगु थें ताया । यदि सकसिनं थये हे खँ थुल धा:सा आन्दोलनय् अवश्य वई थें ताल ।

अथेला आन्दोलन धइगु थये हे बुलुहुँ बुलुहुँ प्रचार प्रसार जुयावनीगु ख: । मनूतसें खँ थूलिसे आन्दोलनय् सहभागी अप्व:जुया वइ । आन्दोलन अवश्य सफल जुइ । थ्व अधिकारया लागि समानताया लागि जुयाचंगु आन्दोलन ख: । थुगु इलय् आन्दोलन सफल मजुल धा:सा नेपा:मितसें यक्व दु:ख सिइमालीगु अवश्यम्भावी ख: ।



# किपुली ल:या बारे त:जिक बिचार गोष्ठी

ज्वजलपा वा:पौ /

थौकन्हय किपू नगर दुने त:धंग समस्या जुया वयाचंगु धइगु त्वनेगु ल:या ख:। छैखाप्वा: पतिकं न्हिया न्हिथं हे त्व:नेगु ल:या समस्या जुयाचंगु बारे खं जुयाचंगु दु।

थ्व हे भवलय किपू नगरपालिकाय त्वनेगु ल:या बारे “कीर्तिपुर नगरपालिका खानेपानी समस्या, अवस्था र समाधानका उपायहरु बारे बिचार गोष्ठी” नां तया: वंगु सुक्रवा: किपूया हिलसाइड होटलय् छगू ज्याभव: जुल।

नागरिक सरोकार केन्द्र व नयाँबजार क्लबया मंका: खसालय् जूगु उगु ज्याभव: नयाँबजार क्लबया नारायण महर्जन न्ह्याकूगु ख:सा नागरिक सरोकार केन्द्रया प्रा.डा. शिवशरण महर्जनया नाय:सुइ जूगु ख:। उगु गोष्ठीया मेपिं पाहाँपिं कीनपाया प्रमुख उद्धव प्रसाद रिजाल, केयुकेल केन्द्रया डा. महेश प्रसाद भट्टराई, केयुकेल किपूया प्रमुख ई.नारायण कर्ण, राजकुमार नर्कर्म अले हिराकाजी महर्जन ख:।

लसकुस न्वचू नापं गोष्ठीया औचित्य बारे पुलांमह मेयर हिराकाजी महर्जन ध्वाथुइका: ब्यूगु ख:।

खानेपानी किपूया प्रमुख कर्ण कार्यपत्र प्रस्तुत याइ ध्या:त:गु ख:सां न्हापां सहभागिपनिगु बिचार:नि कायेगु या:गु ख:। निगू २ मिनेटया ई बिया:

बिचा: तयेगु भवलय कृष्णहरि महर्जन, नजरराम महर्जन, नारायण महर्जन, दुर्कमान महर्जन, रामभक्त महर्जन, ध्रुव महर्जन, राजकुमार महर्जन, रमेश महर्जन, राममान सिंह, टीकाराम महर्जन, विश्वजीत महर्जन, प्रशान्त महर्जन व हीरादेवी महर्जन याना: मुक्कं १३ म्हसैं थ:थ:गु बिचा: तया: ल:या समस्या समाधान यायेगु बिचा: तयादीगु ख:। अनं लिपा कीर्तिपुर नगरपालिका खानेपानी समितिया संयोजक राजकुमार नर्कर्म, केयुकेलया प्रमुख डा. महेश प्रसाद भट्टराई, कीनपा प्रमुख उद्धव प्रसाद रिजाल व खानेपानी किपूया प्रमुख नारायण कर्ण थ:थ:गु बिचा: तयादीगु ख:।

उगु बिचा: गोष्ठी सहभागीया सवाल व बिचा:यात सम्बन्धित पिनिसं उलि दुग्यंक का:गु खनेमदु। वहे सरकारी नीति नियमया ब:कया: लिस: बियादिल। आपतकालिन अवस्थाय् गुगुकथं समस्या समाधान यायेगु बारे सुनां हे बिचा: त:गु खनेमदु।

सभाया अन्त्य सभानायो प्रा.डा. शिवशरण महर्जन नागरिक सरोकार केन्द्रया बारे खं न्ह्यथना: अले न्हापाया ल:या समस्या गुगुकथं समाधान याना: धइगु खं कनादिल। नापं सकलें छप्पं छथी जुया: दृढ निश्चयता पूर्वक सकलें न्ह्यावन धा:सा ल:या समस्या समाधान जुइगु आशा प्वका:दिल।



## नेवा: पत्रकारतय्त् ज्यापु महागुथिपाखें हन

ज्वजलपा वा:पौ /

नेवा: मुद्दायात ल्हवनेगु नितिं, नेवा: पत्रकारतय्गु समस्या समाधान यायेगु नितिं, नेवा: पत्रकारतय्गु पहुँच थ्यंकेगु नितिं नापं समग्र नेवा:तय्गु नितिं हे मंका: कथं ज्या यायेत धका: नीस्वंगु देय्न्त्यंकया नेवा: पत्रकारतय्गु राष्ट्रिय संगठन नेवा: पत्रकार राष्ट्रिय दबूया केन्द्रीय समितिया ज्यासना पुच:यात नेवा: ख्य:या थीथी खल: पुच:तपाखें हनेज्या याना वयाचंगु दु। नेवा: समाज दुने व्यवसायीतय्गु ल्याखं युवातय्सं नीस्वना न्ह्या: वनाचंगु सशक्तगु संगठन नेवा: पत्रकार राष्ट्रिय दबूया वंगु बैशाख ११ गते निक्व:गु त:मुँज्या जुया न्हूगु नेतृत्व ल्ययेगु ज्या जुइ धुंका: ज्यापु समाज, नेपालभाषा सकिपा समाज, नेवा: देय् दबू श्री हलचोक आकाश भैरव गुथि, कलक नागदुंगा सतक पीडित संघ नापं हलिं नेवा: गुथिपाखें थीथी ज्याभव: याना हनेज्या याये धुंकूगु दु।

थ्व हे दथुइ ज्यापुतय्गु राष्ट्रिय संगठन ज्यापु महागुथिपाखें नं नेवा: पत्रकार राष्ट्रिय दबूया केन्द्रीय नेतृत्वयात हनेज्या या:गु दु। वंगु बुधवा: जेठ ५ गते छगू ज्याभव:या दथुइ ज्यापु महागुथि हनेज्या या:गु ख:। महागुथि सहकारी संस्थाया भवन नरदेवी लागाय् छगू ज्याभव:या दथुइ खें सगं बिया नापं भित्तुना पौ ल:ल्हाना अथे हनेज्या या:गु ख:।

ज्यापु महागुथिया थीथी कचाया दुज:पिं नापं यें महानगर समितिया दुज:पिं नापं पत्रकारतय्गु उपस्थितिइ जूगु उगु ज्याभव: ज्यापु महागुथिया केन्द्रीय नाय: राजभाई जक:मिया नाय:सुइ मूछ्याञ्जे न्हुछेकाजी महर्जन न्ह्याकादीगु उगु ज्याभवलय् केन्द्रीय समितिया दांभरी सरिता महर्जन लसकुस च्वचू बियादीगु ख:। उगु ज्याभवलय् नाय: पुच:या येंया दुज: मचाराजा महर्जन, यें महानगर समितिया नाय: बाबुराजा महर्जन नेवा: पत्रकारतय्त् भित्तुना बियादीगु ख:।

ज्यापु महागुथिया केन्द्रीय नाय: राजभाई जक:मिं नं भित्तुना बियादीगु उगु ज्याभवलय् किपू नगर समितिया नाय: नापं सम्मानित जुयादीगु दबूया केन्द्रीय दुज: पत्रकार नजरराम महर्जन, दबूया न्वकूपिं मिरा अमात्य (मिसा न्वकू), टिका प्रधान (स्वनिग: पिनेया न्वकू), दुज:पिं सन्दीप कुमार श्रेष्ठ (चितवन), जीवन श्रेष्ठ (सिन्धुपाल्चोक) व नाय: श्रीकृष्ण महर्जनपिन्सं ज्यापु समाजपाखें थ:पिन्त हनाज्या या:गुलिं कृतज्ञता प्वकुसैं नेवा: समाजया नितिं थ:पिं निरन्तर रुपं न्ह्या: वनेगु बिचा: प्वकादीगु ख:।



समाज रूपान्तरणया नितिं  
महत्त्वपूर्णगु भूमिका म्हितीपिं पत्रकार !

पत्रकार जुइगु छिगू चाहाना  
छित पत्रकार यायेगु जिमिगु योजना  
नेपालमण्डल टेलिभिजनया पत्रकार जुइगु ख:सा  
जिमित स्वापू तयादिसँ।

जिमित मा:गु दु

- रिपोर्टर - न्याम्ह
- क्यामरा पर्सन - निम्ह
- समाचार ब्बनीपिं - स्वम्ह
- मास्टर कन्ट्रोल रूम अपरेटर - निम्ह



स्वापू तयेगु न्हि: नेपाल संवत् ११३६  
बछलाथ्व नव:मि आइतवा:निसैं बछलागा पारु  
आइतव तक ( २०७३ जेठ २ गतेनिसैं जेठ ९  
गते तक)

स्वापू तयेगु थाय्  
नेपालमण्डल टेलिभिजन  
प्या: पुखू, यल, फोन नं. ५५२७५०१

## पाठक प्रतिक्रिया

# छु किपूमितसें पृथ्वीनारायण शाहया न्ह्योने आत्मसमर्पण या:गु ख:ला ?

ने.सं.११३६ बछलाख्व नवमि आइतवा: (२०७३ जेठ २ गते) प्रकाशित ज्वजलपा वा:पौल्य नजरराम महर्जनया “छु किपूमितसें पृथ्वीनारायण शाहया न्ह्योने आत्मसमर्पण या:गु हे ख:ला ?” धा:गु लेखं जिगु ध्यान साला: काल ।

लेखयात ध्यानपूर्वक व्वना । बाघभैरव मन्दिर परिसरय् विकासया ज्या जुयाच्चंगु व्वनेदया मन लयताल । भीगु इतिहास व पहिचान दुगु भीगु छः, दरवार संस्कृति, रितिरिवाज भीसं हे ध्यान तयेमा: संरक्षण यायेमा: । थ्व ज्या न्ह्याम्हसें या:गु जूसां वयात ग्वाहाली बिइमा, सुभाय बिइमा: ।

बांला:गुयात सुभाय बिइगु व बांमला:गु ज्यायात कुंखिनेगु जिगु बानी दु । पत्रिकाय् पिहांव:गु खंयात जक विश्वास मया:से छक: स्व:हे वनेगु बिचा: याना: बाघभैरव दुने वना: स्व:वना । पत्रिकाय् च्यायात:थें हे फ्लेक्स बोर्ड तया:त:गु दु । छः दर्शन या:व:पिं व दर्शन याना: लिहांभायादीपिं दाजुकिजापिनिके थ्व न्ह्यस: तया । “छु किपूमितसें पृथ्वी नारायण शाहया न्ह्योने आत्मसमर्पण या:गु हे ख:ला ?”

सकसिनं जिगु ख्वा: जक स्वया न्वंमवा:से वन । उबले हे छम्ह म्हासिउम्ह दाइ नं थुकिया लागि अनुसन्धान याये धयादिल । अले नापं बाघभैरव मन्दिरं पिहांवया । वय्कलं जित बाघभैरव मन्दिर गुठी व्यवस्थापन समितिया नाय: शुद्ध महर्जनयात म्हासिइका बिल । जिं ल्हा मिलेयाना अले थ:गु नां धया: वया लिपा ज्वजलपा वा:पौ लय् व:गु खँ न्ह्यस: तया । वय्कलं किपूमितय्सं आत्मसमर्पण या:गु हे ख: धयादिल । जि छक्क जुया ।

छिक्के छु प्रमाण दु, अले छु सफूती च्या त:गु दु धका: जिं न्ह्यस: तया: । वय्कलं टि.यू.या लाइब्रेरी च्वंगु इतिहास सफूती च्यायात:गु दु धयादिल । जिं रोलम्बा धा:गु इतिहास मुनात:गु सफूलय् थथे च्यायात:गु मदु थें च्वं धका: थ:गु बिचा: प्कावलय् तक अन च्याम्ह भिम्ह मनूत मुने धुंकल । अले वय्क: शुद्ध महर्जनं थ्व जिं थ:यस्से च्यायागु मखु न्हापा थन हे च्वंगु पुलांगु साइन बोर्डय् थथे च्यायात:गु दु । जिं सारे जक यानागु ख: धयादिल । अथे ख:सा भीसं हानं छक: न्यनेकने याये सफूत व्वना स्वये धया: वया ।

आ: थन न्ह्यस: दनावई थ्व पुलांगु साइनबोर्ड सुनां गुवले त:गु ? सु सरकारया पालय् त:गु ? यदि पंचायत सरकार, जुजु पिनगु पालय् त:गु ख:सा थ्व भूठ नं जुइफु । उबलय् पंचायत सरकारं जनतातय्त यक्व ख्याना न्वंवाये मफय्का त:गु भीसं सिउ उबले इमिसं न्वंवाइपिन्त भुठा मुद्धा तया जेल, भेल याना दु:ख बिइगु नं भीसं सिउ । व पंचायत सरकारयात हाकुतिना बांछ्वय्त भी किपूमितय्सं ज्यान पाना ल्वानागु नं ख: । उबले भी किपूमि प्यम्ह दाजु किजापिं शहिद नं जुयादिल । वयां लिपा राजायात हे बांछ्वया बिइधुन । आ: गणतन्त्र जुइधुंकल ।

पंचायत व्यवस्थाय् तया:त:गु बोर्डयात भीसं आ:तक माने याये मा: ला ? इतिहासय् गनं हे उल्लेख मज्गु, किपूमितय्गु स्वाभिमान नाप स्वापू दुगु थ्व बोर्ड लिक्का: हानं छक: भीसं इतिहास माला: स्वयेगु ख: ला ? भीगु इतिहास, भीगु पहिचान, भीगु रितिथिती संस्कृति भीसं हे म्वाकातय ।

- रामभोला महर्जन  
पांगा, किपू

## किपूमितसें आत्मसमर्पण या:गु मखु

हनेवह:म्ह सम्पादकजु,  
वंगु जेठ २ गते पिदंगु छिगु ज्वजलपा वा:पौल्य पिदंगु लेख “छु किपूमितसें पृथ्वीनारायण शाहया न्ह्योने आत्मसमर्पण या:गु ख: ला ?” धैगु व्वना: जि अचम्म जुया ।

पत्रकारतय् प्यंग: मिखा दइधा:गु धात्थें पत्या: जुल । जि बाघ भैर वस्थानय् यक्व वनेधुन । व ह्याउंगु फ्लेक्स बोर्ड नं खना: । व बोर्डया आख: फुककं व्वनेगु जरुरत मताया । नजरराम दाइनं च्वनिसें क्वथ्यंक व बोर्डय् च्यायात:गु आख: छग: छग: दतले व्वया दिल । भीत न्ह्यलं चायेका: बिल ।

थ्व बोर्डय् च्यायात:गु खं याना: भी स्वाभिमानी किपूमी, वहादुर किपूमी धका: कहलय् जुयाच्चंगु इज्जतयात धू धू यानाबिल । किपूमीतसें आत्मसमर्पण यात धका: थौतक जिं गनं व्वनागु मदु । गनं न्यनागु मदु । जिंला किपूमीतसें पृथ्वीनारायण शाहनाप भिनिदं वहादुरीका साथ ल्वात । लिपा गद्गार किपूमी ध्वाखा चायेका: बिइवं दुहाँ वया: न्ह्यनेलाक्वसित पाला: स्याना:, बन्दुकं कयेका त्याकूगु धइगु न्यनातयागु । गगु कीर्तिपुर धा:गु फिल्मय् नं क्यना: तल । यदि किपूमीतसें आत्मसमर्पण या:गु ख:सा थ्व फिल्म नं भूठ जुल । थ्व फिल्म गथेजुया रिलिज जुल ?

किपूमीतसें पृथ्वीनारायण शाहया न्ह्योने आत्मसमर्पण यात धका: थौतक गनं हे न्यनेमलंगु थौ दकलय् न्हापां थ:थाय हे न्यने खन, व्वने खन । यदि थ्व खँ ख:गु हे जूसां गनं मखंगु आत्मसमर्पण धका: च्वयेमज्यू । स्वक:या पालय् पृथ्वीनारायण शाहया सेनानाप किपूमित वुत धका: जक च्व:सा गा:गु । अंग्रेजी भाषां नं च्यायात:बलय् थ्वला नजरराम महर्जनया मिखा वथें विदेशीतय्गु मिखा नं थुकी लायेफु । उमिसं थुकिया फोटो कया: यंकी इमिथाय् देसय् थज:गु हे प्रचार जुइ । पत्रिका किताबय् च्या बिइ । अले भी किपूमीत ग्याफरा मधाइला ? भीगु इतिहास हे पाना: वनी । थ्व स्वयेबलय् छुं मखुथें च्वंसां भीगु लागि त:धंगु खँ ख: ।

उकिं यदि बाघभैरव संरक्षण गुठीं थ्व बोर्ड हिकेत धेवा मदु धइगु ख:सा गुलि हे धेवा वनी, निस: प्यस:, न्यास: हे वनीका । थुकियात मा:गु धेवा जिं व्यहोरय् यायेत तयार दु । किपूमीतय्गु इज्जतया लागि जूसां थ्व बोर्ड हतय् याये हे मा: ।

तेजमान बज्राचार्य  
थतुभो, किपू- ४

## साहित्य/चिनाखं

## हा गतिलासा का ह: गतिलाई



कवि राम महर्जन,  
नगां, किपू-१६

गुरुवा गुरुमांपिन्सं थ: चेलातय्त

शिक्षा दिक्षा व ज्ञान बिइगु याई

अले इपिं हे लिपा जुलकी

गुरुमां गुरुवा जुइगु ख: ॥

अथेजुया ई भी नेवा: समाजय्

मां अबुपिन्सं थ: मस्तय्त

मर्चानिसें बांलागु ज्या स्यनातई

मस्तय् न्ह्योने बांमलागु खँ ल्हाइमखु ॥

मस्तय् न्ह्योने मां अबुपिन्सं

गथे गथे धया: केन अथे अथे हे

धाये सयकी गथे गथे याना क्यन

अथे अथे हे याय सयकी ॥

मां अबु गतिमलापिनी मस्त

स्यनकी धायगु चलन दु भीगु समाजय

हा: गतिला:सा का ह: गतिलाई

आ: थन नेतात थें हे कार्यकर्तात जुल ॥

थ्वहे खँ नाप ज्व:ला:गु

आ: किपू नगरपालिकाय् खने दया

व:थें च्वं न्ह्म्ह कार्यकारीया अगुवाईलय

न्हापां छैमले लिपा काभ्रे बनथली ॥

केन्द्रीय नेतात नं अथे हे तापाक्क रिसोर्टय्

वना छलफल या वनेगु चलन दु धा:सा


गाउँ शहरया कार्यकर्तात जक छाय् वने

मज्यू गुरुवापिन्सं स्यना ह:थें सयका काल

थ्व खँय् रिसोर्टय् वना भवय् न: वपिन्त

स्यावास बिई हे बिई मा: थें च्वं ॥

## किपूया गथु प्याखं (गं मखा:गु प्याखं)



श्रीकृष्ण महर्जन

## किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थ:गु प्रति सुरक्षित यानादिसँ

## सफू दइगु थाय्

- १) ख्वपया च्याम्हसिंहया स्टेशनरी पस: (श्याम सुन्दरया पस:)
- २) ख्वप कमल विनायकया स्टेशनरी पस:
- ३) किपूया सत:क्वया स्टेशनरी पस:
- ४) किपूया देय् पुगूया बाघभैरव स्टेशनरी पस:
- ५) किपूया पांगा दोवाटोया किपू बूक प्वाइट
- ६) येंया भोताहिंति नातिबज्रया पस:
- ७) येंया कुलाभुलिइ च्वंगु मंका: धुकू पस:
- ८) यल, यल ध्वाखा अर्जुन स्टेशनरी पस:
- ९) स्वापू नितिं मेमेगु फोन नम्बर: ४३३४०१३, ९८४१७५२५८३, ९८४६०४६१२३९

मू

सच्छि तका जक (१००/-)

## सफुतिइ दुने

१) गथु समुदायया इतिहासनिसें वर्तमान तक

२) गथु प्याखनय् दुथ्यानाच्चंगु तान्त्रिक व बैदिक दर्शन

३) नास: छ:यात किसिलिं छाय् तइगु ख: ?

४) किपूया गथु प्याखनय् दुथ्यानाच्चंगु थीथी पक्ष

५) गथु प्याखंया थीथी नां

६) किपूया ख्वा:पा: प्याखं मध्ये गथु प्याखं नापं मेमेगु



# अन्धविश्वासय् लिकुनाच्चंगु विज्ञान



(नेवा:तय्सं न्हापांनिसें थथे याये मत्यः अथे याये मत्यः धका: धया वयाच्चंगु दु। थौ वया उकियात अन्धविश्वास धायेगु या:। याये मत्यः धयातःगुया थीथी कार णत दु। उगु कारणायात कुला स्वयेगु ज्या यात धा:सा अन दुने विज्ञान दु। उकिं पन्नारत्न महर्जनं अज्व:गु हे अन्धविश्वासय् लिकुनाच्चंगु विज्ञानयात कया सफू हे चयादीगु दु। सं)

## तुल्सि मांयात पुजा यायेमा:

उसाँय् बांलाकेगु वासः दयेकेत जडिबुटि मदयेकं मगा:। न्ह्यागुं वासः जडिबुटीं दयेकी। विना जडिबुटी छुं नं वासः दयेके फइमखु।

जडिबुटी वासःया रुपय् तःगु प्रकारं छयलेगु या:। पायेगु, बुलेगु पनेगु, नयेगु आदि। वैज्ञानिक तरिकां दयेकातःगु वासः नं जडिबुटि हे दयेकीगु खः। जडिबुटि नं वैज्ञानिक तरिकां दयेकातःगु वासःया ज्या कायेगु या:।

जडिबुटिमा नं वनस्पति जगत दुने ला:। थज्या:गु वनस्पति मध्ये तुल्सिमा नं छगू खः। थ्व वनस्पति तःगु प्रकारं वासःया रुपय् छयलेगु या:। उकि मध्ये थुकिया हः सुथय् खालि प्वाथय् नयेगु नं छगु तरिका खः।

पुजा याये कथं सुथय् नीलः, प्रसाद आदि छाना: हः क्वताना नयेगु याइ। थ्व यक्व धा:सा नयेमज्यू न्हि निहः स्वहः

जक नयेमा:। थुकीं थीथी ल्वय् लंकेगु क्षमता दु। ख्वा:या छेंगु यचुकेगुनिसें कया: ब्लडप्रेसर, चिनिन्वय्, कब्जियत आदि ल्वय् थ्व जडिबुटि लं धयागु मान्यता दु।

पुजा यायेगु धयागु मानय् यायेगु खः। मानय् यायेगु धयागु थःयात भिं याइम्ह अथवा भिं याइगुयात याइगु खः। मेकथं धायेगु खःसा पुजा यायेगु धयागु संरक्षण यायेगु नं खः। संरक्षण व सम्बर्धन मयायेकं ता:ईतक छुं नं चीज दयाचनी मखु।

न्हिन्हि हः लिकया च्वनेमा:गु थज्यागु मायात संरक्षणया लिसें खुराक नं बी माली। खुरका वीगु धयागु मलजल याना: खः। पुजा याइबल्य् नीलः तिनी, प्रसाद छाइ। थ्व धयागु मलजल यायेगु सरह खः। नियमित रुपं मायात मा:कथं मलजल यानाच्वन धायेवं न्ह्यागु नं मा

सल्लफल्ल ब्वलनावइ। उकिं वीगु फल नं अप्वयावइ।

तुल्सिमायात नये धुंका: थी मज्यू धयागु लोकमान्यता दु। थज्या:गु मान्यता धयागु छगू कथं थ्वया संरक्षण यायेगु खः। न्ह्याबलें न्ह्यागु या:सां जिलकि न्ह्याम्हसिनं नं न्ह्याबलें न्ह्यागु यायेफइ।

थुकिं याना: मा ब्वलनीगु कयाय् अवरोध वयेफु। कचा आदि नं त्व:धुलीगु भय दइ। खालि प्वाथय् नयेमा:गु थ्व ब्वति नये धुंका: नयां उलि अर्थ मदइगुलिं हः क्वताई धका: नं नये धुंका: थी मज्यू धयातःगु खः।

थुगभनं भीगु उसाँय् बांलाकेत महत्वपूर्ण भूमिका दुगु थज्या:गु मायात संरक्षण व सम्बर्धनया नितिं तुल्सिमायात पुजा यायेमा व नये धुंका: थी मज्यू धयातःगु खः।



पन्नारत्न महर्जन

तुल्सिमायात नये धुंका: थी मज्यू धयागु लोकमान्यता दु। थज्या:गु मान्यता धयागु छगू कथं थ्वया संरक्षण यायेगु खः। न्ह्याबलें न्ह्यागु या:सां जिलकि न्ह्याम्हसिनं नं न्ह्याबलें न्ह्यागु यायेफइ। थुकिं याना: मा ब्वलनीगु कयाय् अवरोध वयेफु। कचा आदि नं त्व:धुलीगु भय दइ। खालि प्वाथय् नयेमा:गु थ्व ब्वति नये धुंका: नयां उलि अर्थ मदइगुलिं हः क्वताई धका: नं नये धुंका: थी मज्यू धयातःगु खः।



## नेवा: मखुपिनिगु नेवा: नुग:

श्रीकृष्ण महर्जन

### नेवा: मखुपिनिगु नेवा: नुग:

नेवा: मखया नं नेवा: भाय् ल्हाइपिं मनूत यक्व हे स्विनिगल्य् दु अले स्विनिगलं पिने नं यक्व हे दु धइगु छगू उदाहरणया ज्याभवः मेट्रो एफ एमया मरु सतः व नेपालमण्डल टेलिभिजननया ज्याभवः नेवा: फल्वा जुयाच्चंगु दु।

उगु कथंया निगू हे ज्याभवल्य् अज्वःपिं व्यक्तिवपिन्त अन्तर्वार्ता कायेगु भवलय् गुगु समुदाय वा जातीया मखू खः उगु हे समुदाय व जातीया बारे नं न्यनेकने याना वयाच्चंगु खः। उकिं यान नेवा:तय्सं नं नेवा: हे भासं मुस्मांतयगुनिसें विदेशीतयगु चाल चलन अले संस्कृति, जीवन पद्धती तर्क सिइके फयाच्चंगु दु। अन्तर्वार्ताय् पाहां कथं वयादीपिं व्यापारीनिसें विद्यार्थीतय्सं तर्क नेवा: संस्कृति, नेवा: भाय् नापं नेवा:तयगु चर्चा नापं प्रशंशा यानादी। उलि जक मखु नेवा: जुया नं थः मस्तयूत नेवा:

भाय् मल्हाकीपिन्त छगू कुं खिनेगु अले थः मस्तयूत नेवा: भाय् स्यनेमा: धका: इनाप याना वयाच्चंगु दु।

छम्ह नेवा: नं धा:गु जूसा उकिं लिच्चः मलायेफु तर नेवा: मखुसां नेवा: भाय् ल्हानादीम्ह मनुखं धाइबलय् अवश्य नं उकिं लिच्चः लाइगु अवस्था जुइ। अथे नेवा: भासं अन्तर्वार्ता कायेगु भवलय् छगू निगू अनुभव थन न्ह्यब्वये

जिगु देय् जितः यो जिगु भाय् जितः यो जिगु मांम भाषा तसकं जितः.....

थःमाम भाषा मल्हासा सुनानं सरावी व भीत खइच्चम्ह मामं

सुना हा:गु ता:ला भ्याय् भ्याय् च्वलेचा

स्या:सां मधा:स्व माय् माय् व फैचां

थुगु म्ये हाहां हे नेवा: मखुम्ह पाण्डे थरया छम्ह विद्यार्थी खया हल। व नं नेपालमण्डल टेलिभिजननया नेवा: भाय् मखुसां नेवा: भासं खँ ल्हाइपिलिसे कायेगु अन्तर्वार्ताया ज्याभवः नेवा: फल्वाय्। नेवा: वसः पुना टेलिभिजनय् अन्तर्वार्ता विइत



वःम्ह यशोधा पाण्डे भावुक जुया खया हयेवं जितः छु याये छु याये जुल। जिं थःगु नुगःयात चिना अले प्रशंग मेगु हे न्ह्यथना। थ्व छगू थज्वःगु घटना खः गुगु घटना धइगु नेवा: मखुम्ह छम्ह मिसा मचां नेवा: भासं म्ये हाहां खयाहःगु घटना खः।

थ्व घटना स्वयेबलय् एशोधा पाण्डेयात गथे याना नेवा: मखु धायेगु? वय्कः नेवा: मखुसां नं नेवा: भासं म्ये हाला नेवा:तयगु भावना पिब्वया थः हे खयाहःगु दु।

अथे हे नेवा: मखुपिं लिसे अन्तर्वार्ता कायेगु भवलय् ब्राम्हण

समुदायपाखें दयेकरुगु संगठन ब्राम्हण समाजया उपाध्यक्ष नापं कोइराला समाजया अध्यक्ष रुभयनाथ कोइरालालिसें नं नेवा: फल्वाय् सःतेगु ज्या याना।

अले वय्कःलिसे अन्तर्वार्ताया भवलय् ब्राम्हण समाज धका: छाया गठन यायेमा:गु धइगु खँ न्यनेगु भवलय् वय्लकं २०६२२०६३ सालया जनआन्दोलन लिपा देशय् हरेक क्षेत्रय् कोटा सिस्टम बल।

जागीर नयेमा:सां कोटा सिस्टम बल। अले खय् बम्हुतयूत कोटा मदइगु जनजाति, मधेसी, दलित नापं ल्यूने लानाच्चंगु समुदाययात

दइगु उकिं याना कन्हय् थः मस्तयूगु भविष्यया नितिं समाज दयेका आन्दोलनय् क्वहां वयागु खः। अज्वःगु कथंया व्यवस्था याये मजिउ अले धेधेबल्लया आधारय् हरेक क्षेत्रय् क्षमता दुपिं मनुत वने दयेमा: धका: लिसः बियादीगु खः। उकिं हे न्हापाया सविधानसभाया अन्तिम इलय् थःपिं सतकय् क्वहां वयागु खः धका: धयादीगु दु।

रुभयनाथ कोइरालाया थुगु धापू स्वयेबलय् वय्कःपिं र जनीतिक रुपं तसकं सचेत जुया न्ह्या: वंगु खने दु। अले थः मस्तयूगु नितिं धका: वय्कःपिं सतकय् क्वहां वःगु खने दु। तर

नेवा: नापं आदिवासी जनजाति धा:सा अज्वःगु खँय् खास हे चिउता तया सः थ्वयेकेगु यानाच्चंगु खने मदु। उगु हे कथं नेवा: मखुसां नेवा: भासं अन्तर्वार्ता कायेगु भवलय् कृष्णलाल क्षेत्रीयात नं ब्वना। अले वय्कलं अन्तर्वार्ता विइगु भवलय् स्विनिगः नापं स्विनिगः जःखःयात अवश्य नं नेवा: राज्य धका: हे घोषणा यायेमा:गु बिचा: प्वकादिल। नेवा:तयगु आदिभूमि स्विनिगः जूगुलिं स्विनिगः व स्विनिगः जःखःयात नेवा: राज्य हे धायेमा: धका: धयादीगु खः। कथंहं.....

## चक्रमान प्रतिष्ठानं पत्रकारिता तालिम बीगु

श्री चक्रमान डंगोल स्मृति प्रतिष्ठानं थ्वहे जेठ १६ गतेनिसं पत्रकारतयगु क्षमता अभिवृद्धि याय् गु तातुना: पत्रकारिता ख्यलय् क्रियाशील पत्रकारपिन्त तालिम बीगु जूगु दु ।

ज्याभव:या कजि शर्मिला सुवालं तिकिभ्या:यात वियादीगु जानकारीकथं १६ गतेनिसं न्ह्याइगु ज्याभवलय् वरिष्ठ फोटोपत्रकार राजभाइ सुवाल व वरिष्ठ पत्रकार पुष्करभक्त माथेमापिसं पत्रकारिता, सञ्चार व फोटोपत्रकारिताया विषयस प्रशिक्षण वियादीगु जूगु दु । वय्कलं थुकियालिसं वर्तमान प्रेस कानून व आचार संहिताया विषयस नं प्रशिक्षण जुइ धयादीगु दु ।

कजि सुवालं वियादीगु जानकारीकथं थुगु तालिम प्रतिष्ठानया ग्वसालय् नेवा: मिडिया क्लब, रेडियो उपत्यका ८७.६ मेगाहर्ज व नेवा: न्यूज डट कम अनलाइनया सहकार्यय् न्ह्याय्थ्यंगु खः ।

## जेठ १० गते सोमवा: किपूया गेटय् वनेनु जनताया जुलुसय् सहभागी जुइनु

पहिचान सहितया संघीयता,  
नेवा: स्वायत्त प्रदेश, भाषिक समानता,  
समानुपातिक समावेशीया नितिं संविधानया  
पुनरसंरचना यायेमा:गु माग याना जुइगु  
जनताया प्रदर्शन व सभाय् ब्वति कायेनु ।

## जेठ १० गते सोमवा: जुलुस जुइगु

थाय्: किपूया गेट न्हूबजा:

ई: सनिलया ४ बजे

सभा जुइगु

थाय् त:गवपि (नगां दोवाटो)

## संघीय गठबन्धन

ग्वसा खल:

तपाईको टोलमा भएका घटना कीर्तिपुरको समाचार  
बनाउने हो भने तपाई एक कल फोन गर्नुस्  
हामी तपाईको टोलको समाचार कीर्तिपुरको  
समाचार बनाईदिनेछौं

कीर्तिपुरको  
चित्रण



किपुलिं पिदनाच्चंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३  
फोन नं.: ४३३३००७, ९८४९४०९०७७

## रेडियो उद्घोषण स्यनाच्चपिं मेट्रो एफएम भ्रमणय्



### —विगेन तुलाधर—

रेडियो उपत्यका ८७.६ मेगाहर्ज व मातृ ससक्तिकरण समूहया सहकार्य कथं न्ह्यानाच्चंगु रेडियो उद्घोषण तालिम ज्याभव:या भवलय् मेट्रो एफएम ९४.६ मेगाहर्जय् चाहिकूगु दु ।

तालिम कयाच्चपिं २० म्ह प्रशिक्षार्थीपिसं ब्वति का:गु ज्याभवलय् मेट्रो एफएमया ज्याभव: न्ह्याकामिलिसं नेवा: पत्रकार राष्ट्रिय दबूया केन्द्रीय नाय: श्रीकृष्ण महर्जनपाखें थौंया इलय् एफएमया महत्व व पत्रकारितायात कया: ध्वाथुकादीगु खः । मेट्रो एफ एम भ्रमणया भवलय् तालिमया संयोजकलिसं भ्रमण पुच:या नेतृत्व यानादीम्ह विगेन तुलाधरं नं प्रशिक्षार्थीपिन्त एफएम प्रविधिया बारे ध्वाथुइका दीगु खः । भ्रमणय् वपिं प्रशिक्षार्थीपिसं थ:पिसं न्हापांखुसी प्रत्यक्षरूपं एफएमय् ज्याभव: न्ह्याकूगु खनागु व थन वया: थ:पिसं यक्व खँ सय्के सीके खनागु जानकारी ब्यूगु दु ।

तिकिभ्या:यात संयोजक तुलाधरं ब्यूगु जानकारी कथं आ: वइगु आइतवा: थुकथं हे कान्तिपुर एफएमय् नं भ्रमण याकीगु जूगु दु ।

थुगु तालिम नारायण परिवार क्लब भवनय् न्हियान्तिथं सनिलया ४ ता: इलय् न्ह्यानाच्चंगु ख:सा निर्मल बज्राचार्य व विराजकाजी राजोपाध्यायं प्रशिक्षण वियाच्चनादीगु दु । थुगु प्रशिक्षण लच्छितक न्ह्याइगु जूगु दु । प्रशिक्षण वंगु बैशाख २५ गतेनिसेरु न्ह्या:गु खः ।

किपा : बालकृष्ण महर्जन र विगेन तुलाधर

ज्वजलपा वा:पतिइ छिगू चिनाखँ/बाखं/हाइकू  
विज्ञापन व मेमेगु च्वसू पिथनेगु जूसा जिमित  
स्वापू तयादिसँ

सकलसिगु मंका: स:



ज्ञाजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७,  
९८०८६२६४२० ई-मेल : kirtipur\_sandesh@live.com